

Sumiiffinni nunami aalajangersimasuni takornariartitsinermut akuersissuteqartarnissaq pillugu Inatsisartut inatsisaat

Kapitali 1

Atorneqarfia

Takornariartitsinermini niuerutit, takornariartitsinermini sammisat aamma akuersissutit ilaallu ilanngullugit.

§ 1. Inatsisartut inatsisaata atuuffissai tassaapput suliffeqarfinnut takornariartitsisartunut, pisinnaatitsisummik pigisaqartunut, ingerlatat suliffeqarfinnut takornariartitsisartunut, takornariartitsinermini niuerutitut, takornarianut aamma takornariartitsinermini ingerlatanut akuersissutitut ilaasunut inatsisartut inatsisaat akuersissutitut atuutissaaq.

Imm. 2. Inatsisartut inatsisaat sukisaarsaatigalugu aalisarnissamut akuersissutini ilaasut inatsisartut inatsisaanni ingerlatanut ilaasunut atorneqassanngilaq.

Illuutit, sanaartukkat, ilusilersukkat, aqqusernit attaveqaatillu allat

§ 2. Inatsisartut inatsisaata atuuffigai illut najugaqarfusut, illuutit allat, sanaartukkat, ilusilersukkat, aqqusernit attaveqaatillu allat, takornariartitsinermini niuerutitut inatsimmut ilaasunik neqerooruteqarnermut, tuniniaanermit imaluunniit takornariartitsinermini niuerutitut tunisinernut atatillugu.

Kapitali 2

Nassuiaatit

Takornariat, takornarianut niuerutit aamma takornariartitsinermini ingerlatat pillugit nassuiaatit

§ 3. Takornariatoq tassaavoq, inuk takornariartitsinermini nioqqutissamik pisinissani pillugu isumaqatigiissuteqartoq.

Imm. 2. Takornariartitsinermini nioqqutissaaq tassaavoq, kiffartuussut akiliuteqarnikkut tunniunneqartoq takornariartitsinermilu ingerlatamik ataatsimik arlalinnilluunniit periarfissaqarluni tunniussineq ilanngullugu, tak. *imm.* 3.

Imm. 3. Takornariartitsinermini ingerlatat inatsimmi matumani ingerlataq tassaavoq sukisaarsaatigalugu siunertaqarluni akiliuteqarnikkut inuussutissarsiutigalugu suliaqartumit neqeroorutaasartoq.

Takornariartitsinermi sammisaqarnernut akuersissutit aamma pisinnaatitaanermik pigisaqartoq

§ 4. Takornariartitsinermi sammisaqarnernut paasineqassapput takornariartitsinermi nioqqutissamik arlalinnilluunniit tunniussisinnaatitaasoq sumiiffimmi tigussaasumi aalajangersimasup iluani. Takornariartitsinermi sammisaqarnernut akuersissut pisinnaatitaanermik pigisaqartumut tunniunneqartarpoq.

Imm. 2. Pisinnaatitsissummik pigisaqartoq tassaavoq inuk imaluunniit suliffeqarfik akuersissummik pissarsereernermi pisinnaatitaasoq pisussaaffeqartorlu.

Ingerlatat takornariartitsinermi sammisaqarnissamut akuersissummut ilaasut

§ 5. Ingerlatat takornariartitsinermi sammisaqarnissamut akuersissummut ilaasut tassaapput ingerlatat takornariartitsinermi nioqqutissanik, takornariartitsinermilu ingerlatanut tamakkununga attuumassuteqartunik tunniussisinaanermut pisariaqartinneqartut.

Imm. 2. Ingerlat suut akuersissummut ilaatinneqassanersut pillugit killilersuutitik Naalakkersuisut aalajangersaasinnaapput, tak. imm. 1.

Kapitali 3

Akuersissuteqarnissamut piumasaqaatit

§ 6. Takornariartitsinermi nioqqutissanik tamakkunungalu atatillugu kiffartuussutit pillugit, sumiiffimmi arlalinnilluunniit akuerissuteqarnissamut piumasaqaatinut ilaasunik tunniussisinaanerit pillugit Naalakkersuisut aalajangersaasinnaapput.

Imm. 2. Takornariartitsinermi nioqqutissaq sumiiffimmut akuersissuteqarnissamut piumasaqaatinut ilaappat, takornariartitsinermi nioqqutissaq taamaallaat takornariartitsinermi ingerlataqarnissamut akuersissut takornariartitsinermi nioqqutissamut sumiiffimmullu sammisamit ilaasoq taamaallaat tunniunneqarsinnaavoq.

Imm. 3. Sumiiffimmut akuersissuteqarnissamut piumasaqaat pinngitsoortitsissanngilaq ingerlatat sumiiffimmi ingerlanneqarsinnaanissaannut, tamakku isumagissallugit akiliisoqarsimanngikkaluartoq. Kinaluunniit sumiiffimmi ingerlatanik taamaattunik isumaginnissinnaavoq, inatsisartut inatsisaannit matumanga imaluunniit inatsisit allat imaluunniit aalajangersakkat allat tamakkuninnga aalajangiisimangippata.

Imm. 4. Sumiiffimmi takornariartitsinermi nioqqutissamut akuersissuteqarnermi piumasaqaat pinngitsoortitsissanngilaq, takornariartitsinermi nioqqutissanik allanik tamatumungalu atatillugu kiffartuussutitik allanik tamatumunnga attuumassuteqartunik sumiiffimmi tunniunneqarsinnaasut.

Kapitali 4

Akuersissutitik tunniussineq

Takornariartitsinermi sammisaqarnissamut akuersissutitik tunniussisarneq akuersissummullu piffissaliussaq

§ 7. Sammisamut erseqqinnerusumik killilerneqarsimasumut erseqqinnerusumillu piumasaqaatinik aalajangerneqarsimasunut takornariartitsinermi nioqqutissamik arlalinnilluunniit tunniussinissamut Naalakkersuisut akuersissummik tunniussisinnaapput, tak. § 6, imm. 1 (takornariartitsinermi ingerlatamut akuersissut). Takornariartitsinermi ingerlatassamut akuersissut kisermaassiffiusussatut tunniunneqassaaq.

§ 8. §7 malillugu takornariartitsinermi ingerlatassamut akuersissut periutsit imm. 2-3-mi taaneqartut arlaannut tunniunneqarsinnaavoq.

Imm. 2. Akuersissummik tunineqarnissaq pillugu tamanut nalinginnaasumik qinnuteqartoqartitsineqareerpat akuersissut tunniunneqarsinnaavoq (neqerooruteqartitsineq). Qinnuteqartoqaqqusilluni nalunaaruteqarneq, qinnuteqarnissamut piffissaliussaq ikinnerpaamik ullunik 45-inik sioqqutisumik Naalakkersuisut nittartagaatigut allatulluunniit Naalakkersuisut tamanut saqqummiutissavaat. Neqeroorummi tunngaviussaaq, pilersaarusiornermi oqartussaasup susassaartup, sumiiffik pineqartoq takornariartitsinermik ingerlataqarnissamut pilersaarusiorgiaisimassagaa, kiisalu ingerlatat suut akuersissummut ilaatinneqassanersut aalajangersarsimassallugit.

Imm. 3. Sumiiffimmut akuersissuteqarnissamik nalunaaruteqarneq imm. 2 malillugu siumut qinnuteqaqqusisoqarsimatinagu tunniunneqarsimassappat, sumiiffillu pineqartoq pilersaarusiornermut oqartussaasoq susassaartup sumiiffik pineqartoq takornariartitsinermi ingerlatanut pilersaarusiorsimanagu, Naalakkersuisullu isumaqarpata qinnuteqaat suliarineqartariaqartoq, qinnuteqaat pilersaarusiornermi oqartussamut Naalakkersuisut ingerlateqqissavaat, apeqquteqaatigissallugulu pilersaarusiornermut oqartussaasup sumiiffik qinnuteqarfigneqartoq takornariartitsinermi ingerlatanut ilanngunneqassanersoq kissaatigineraa. Pilersaarusiornermut oqartussap sumiiffik qinnuteqarfigneqartoq tamakkiisumik ilaannakortumilluunniit takornariartitsinermi ingerlataqarnermut pilersaarutiginiarlugu ilanngunniarlugulu kissaatigisimappagu, akuersissummik tunniussinissaq siunertarlugu Naalakkersuisut immikkut ittumik innuttaasunut ammasumik qinnuteqaqqusisinnaapput.

Imm. 4. Imm. 3 malillugu qinnuteqarnermi, pilersaarusiornermut oqartussaasup apeqquteqaatip tigoreernerani ullut 90-it qaangiutsinnagit Naalakkersuisut apeqquteqaataat akissuteqarfignissaq.

Imm. 5. Qinnuteqaatit periutsit imm. 2-3-mi taaneqarsimasut malillugit qinnuteqaatit tunniunneqarsimasut tunngavigalugit Naalakkersuisut akuersissummik tunniussinngitsoorsinnaapput.

§ 9. § 7 malillugu takornariartitsinermi ingerlatassanut akuersissut toqqartuisarnermi piumasaqaatit imm. 2-6-imi taaneqartut tunngavigalugit tunniunneqassaaq.

Imm. 2. Qinnuteqartup suliaqarfimmut ilisimasai, tamakkununga ilaallutik qinnuteqartup takornariartitsinermi nioqqutissanik taamaattunik allanilluunniit imaluunniit kiffartuussutitik allanik assingusunik neqerooruteqarneq, tuniniaaneq tunniussisarnerlu eqqarsaatigalugit siusinnerusukkut misilittagai.

Imm. 3. Qinnuteqartup aningaasarsiornikkut tunuliaqutaa.

Imm. 4. Periuseq qinnuteqartup takornariartitsinermi nioqqutissap imaluunniit nioqqutissat qinnuteqaammut ilaasut qanoq ililluni tunniunnissaannut siunertaqarnerseq pillugu qinnuteqartup ingerlataqarnissaminut missiliuutaani uppersarsarneqarsimasut, tamakkununga ilaallutik:

1) Qinnuteqartup nioqqutissamik nittarsaassisinnaassusia kiisalu tuniniaaffissanik sunniuteqartunik

pilersitsinnaassusia.

2) Qinnuteqartup suliffissanik pilersitsinissaminut kiisalu isumaqatigiissusiornermi, pilersuinermi kiffartuussutinilu pilersuisunik nunaqavissunik atuissaminut piumassuseqarnera piginnaasaalu.

Imm. 5. Taamattaaq Naalakkersuisut qinnuteqartunik toqqartuisarnermi piumasaqaatit imm. 2-5-imi taaneqartut malillugit naliliinermi naligiissutut nalilerneqartut akornanni inaarutaasumik toqqaanissaq siunertaralugu toqqartuinermi piumasaqaatit tulluuttut allat, nammineq isummanik aallaaveqanngitsut kinaassusersuinngitsullu allat aalajangersinnaavaat.

Imm. 6. Piumasaqaatit imm. 2-5-imi tamakkulu akornanni imminnut pingaarnersiorneri pillugit aalajangersakkat §8, imm. 2-3-mi taaneqartuni qinnuteqaqqusinerit ilanngullugit tamanut saqqummiunneqassapput.

Pilersaarusiorneq aamma nunaminertanik atuisarneq pillugu inatsisartut inatsisaat kiisalu inatsit malillugu pilersaarutit aalajangersakkallu

§ 10. Takornariartitsinermi ingerlataqarnissamut akuersissut taamaallaat sumiiffimmut tunniunneqarsinnaavoq, akuersissut malillugu ingerlatat isumagineqarneranni pilersaarusiortarneq aamma nunaminertanik atuisarneq pillugu inatsisartut inatsisaat kiisalu inatsit malillugu pilersaarutit aalajangersakkallu allat aalajangerneqarsimasut aammalu inatsit malillugu aalajangerneqarsimasut malillugit ingerlanneqassappata.

Imm. 2. Pissutsit imm. 1-imi ilaatinneqartut pillugit aalajangernerit pilersaarusiortarneq kiisalu nunaminertanik atuisarneq pillugu Inatsisartut inatsisaat malillugu kommunalbestyrelsimit imaluunniit Naalakkersuisunit aalajangerneqassapput.

Akuersissummut piffissaliussaq

§ 11. Takornariartitsinermi ingerlatanut akuersissut ukiut 5-it angullugit tunniunneqartarpoq, takuulli imm. 2.

Imm. 2. Akuersissut ukiut 20-t angullugit tunniunneqarsinnaavoq, ingerlatassanut pilersaarutit isumaginissaannut pisariaqartinneqartutut kiisalu aningaasarsiornikkut sinneqartooruteqarnissamik periarfissaqartutut isumaqarfigineqarpata.

Imm. 3. Akuersissuteqarnermi piffissaliussap qaavatigut ukiut 5-t angullugit akuersissuteqarneq Naalakkersuisut sivitsorlugu tunniussinnaavaat. Piumasaqaatit allanngorneri tunngavigalugit sivitsuineq tunniunneqarsinnaavoq. Sivitsuineq arlaleriartumik tunniunneqarsinnaavoq.

Imm. 4. Akuersissummut ataatsimut piffissap katinnera ukiut 30-it sinnersinnaanngilaa.

Kapitali 5

Pisinnaatitsissummik pigisaqartoq

Suliaqarfitsigut piginnaasat aningaasarsiornikkullu tunuliaqut

§ 12. Takornariartitsinermi ingerlataqarnermut akuersissut malillugu pisinnaatitsissummik pigisaqartoq ingerlatanut akuersissummut ilaatinneqartunut suliaqarfitsigut piginnaasanik aningaasarsiornikkullu

pisariaqartitanik tunuliaquteqarnissaa pisariaqarpoq.

Pisinnaatitsissummik pigisaqarsinnaasut

§ 13. Takornariartitsinermi ingerlataqarnissamut akuersissut inummut, tak. § 14, imaluunniit suliffeqarfimmut, tak. § 15, tunniunneqarsinnaavoq.

Inuk akuersissummik pigisaqartutut

§ 14. Takornariartitsinermi ingerlataqarnermut akuersissut inummut piumasaqaatinik makkuninnga tamanik eqquutsitsisumut taamaallaat tunniunneqarsinnaavoq:

- 1) Inuk piffissami katillugit ikinnerpaamik ukiut marluk sioqqullugit ilaatinneqartunut Kalaallit Nunaanni inuit allattorsimaffiat malillugu najugaqarsimasoq.
- 2) Inuk inuit allattorsimaffiat malillugu Kalaallit Nunaanni najugaqartoq.
- 3) Inuk Kalaallit Nunaanni tamakkiisumik akileraartussaataasooq.
- 4) Inuup aningaasatigut pisuussutiminik tamakkiisumik atuisinnaatitaasooq, tamatumunngalu atatillugu akilersuinerminik unitsitsisimassanani, akiliisinnaajunnaarsimassanani imaluunniit tamakkununga nallersuussinnaasunik inissisimassanani.

Imm. 2. Inuk akuersissut malillugu pisinnaatitsissummik pigisaqartoq, piffissaq akuersissuteqarfusoq tamaat imm. 1-imi piumasaqaataasut eqquutsissimassavai.

Suliffeqarfik pisinnaatitsissummik pigisaqartutut

§ 15. Takornariartitsinermi ingerlataqarnissamut akuersissut taamaallaat suliffeqarfimmut piumasaqaatinik makkuninnga eqquutsitsisumut tunniunneqarsinnaavoq:

- 1) Suliffeqarfik aktieselskabiussaaq imaluunniit anpartselskabiussaaq Kalaallit Nunaanni angerlarsimaffeqartutut nalunaarsorsimasoq.
- 2) Suliffeqarfik aningaasatigut pisuussutiminik tamakkiisumik atuisinnaatitaasooq, tamatumunngalu atatillugu akilersuinerminik unitsitsisimassanani, akiliisinnaajunnaarsimassanani imaluunniit tamakkununga nallersuussinnaasunik inissisimassanani.

Imm. 2. Suliffeqarfik akuersissut malillugu pisinnaatitsissummik pigisaqartup piffissaq akuersissuteqarfusoq tamaat imm. 1-imi piumasaqaatit eqquutsittussaavai.

Kapitali 6

Namminersorlutik Oqartussanut oqartussanulluunniit allanut akiliutit

§ 16. Takornariartitsinermi ingerlataqarnissamut akuersissummik pisinnaatitsissummik pigisaqartoq Namminersorlutik Oqartussanut imaluunniit oqartussanut allanut akiliuteqartassasoq Naalakkersuisut malittarisassanik aamma akuersissuteqarnissamut piumasaqaatit pillugit aalajangersaasinnaapput. Tamatumunnga atatillugu aalajangersarneqarsinnaavoq akuersissummi nunaminertap angissusia tunngavigalugu naatsorsuereernermi akitsuummik akiliisoqartassasoq (nunaminertamut akitsuut), akuersissut malillugu ingerlatat malitsigisaannik pisinnaatitsissummik pigisaqartup kaaviiaartitaasa

amerlassusai tunngavigalugit naatsorsuinikkut akitsuummik akiliisoqartassasoq (kaaviiartitsinermut akitsuut), akuersissut malillugu ingerlataqarnerit malitsigisaannik pisinnaatitsissummik pigisaqartup aningaasarsiornikkut sinneqartoorutitigut pissarsiarisaasa amerlaqataanik akitsuummik akiliisoqartassasoq (sinneqartoorutinit akitsuutit) imaluunniit taakku ilaat imaluunniit taakku tamakkerlugit akuleriisinnerisigut.

Kapitali 7

Pisinnaatitsinermik pigisaqartup pisussaaffi

Ingerlataqarnissamut pilersaarutit

§ 17. Takornariartitsinermik ingerlataqarnissamut akuersissut malillugu ingerlataqarnissamut pisinnaatitsissummik pigisaqartup pilersaarutai, tamakkununga ilaallutik illuutini aamma sanaartukkanik ilaallu ilanngullugit pilersitsineq atuinerlu (ingerlataqarnissamut pilersaarutit) ingerlatat aallartinneqannginneranni Naalakkersuisunit akuerineqaaqarsimassapput. Pissutsit allanngorneri pisariaqartitsippata, pilersaarutit allanngortinneqarneri pillugit pisinnaatitsissummik pigisaqartup Naalakkersuisunut akuerineqartussanngorlugit nassutissavai.

Pisinnaatitsissummik pigisaqartup nalunaarusiortarnera paasissutissanillu nalunaaruteqartarnera

§ 18. Pisinnaatitsissummik pigisaqartooq ingerlatat akuersissummut ilaatinneqartut pillugit akuttunngitsumik Naalakkersuisunut nalunaarusiortassaaq.

Imm. 2. Pisinnaatitsissummik pigisaqartup nalunaarusianik nassiussisarnera paasissutissanillu nalunaaruteqartarnera pillugu malittarisassanik akuersissuteqarnermilu piumasaqaatinik erseqqinnerusunik Naalakkersuisut aalajangersaasinnaapput.

Kapitali 8

Akuersissuteqarnek malillugu takornariartitsinermi ingerlatat pillugit ingerlatallu taamaatinneqarneranni pisussaaffiit

§ 19. Pisinnaatitsissummik pigisaqartooq akuersissut malillugu ingerlatat unitsinnerini illuutini sanaartukkanillu ilaallu ilanngullugit piginnaatitsissummik pigisaqartup pilersissimasaanik paaassasoq pillugu Naalakkersuisut malittarisassanik akuersissuteqarnermilu piumasaqaatini aalajangersaasinnaapput, kiisalu sumiiffimmi kalluarneqartumi salinermik isumaginnissasoq, kingornalu nalunaarsuinermik assigisaannillu isumaginnissasoq (nakkutilliineq).

Imm. 2. Ingerlatsinissamut pilersaarummi imaluunniit ingerlatsinissamut pilersaarutit allanngortinneqarneranni, tak. § 17, Naalakkersuisut akuersissuteqarnerminni pisinnaatitsissummik pigisaqartup imm. 1 malillugu pisussaaffimminik eqquutsitsinissaata qulakkeerinninnissaa pillugu piumasaqaatinik aalajangersaasinnaapput, tamakkununga ilaallutik qularnaveeqqusiinissaaq pillugu. Pissutsit allanngortinneqarneranni pisariaqartitsineqassappat, tamakkununga ilaallutik illuutini imaluunniit sanaartukkanik ilaallu ilanngullugit allanngortitsinermi imaluunniit alliliinermi, piumasaqaatit allanngortinneqarnissaat Naalakkerkkersuisut aalajangersaasinnaapput, tamakkununga ilaallutik

qularnaveeqqusiinerit allanngortinneqarneri pillugit.

Imm. 3. Iliuusissat imm. 1-imi taaneqartut pillugit peqquneqarnerit pisinnaatitsissummik pigisaqartup eqquutsinngippagit, Naalakkersuisut pisinnaatitsissummik pigisaqartup akiligassaanik aarlerinaatinilu akisussaaffissaanillu iliuusissanik isumaginnissinnaapput.

Kapitali 9

Takornariartitsinissamut ingerlataqarnissamut akuersissutip tunineqarnera, atorunnaarsinneqarnera taamaatinneqarneralu

§ 20. Takornariartitsinermi ingerlatassanut akuersissummik toqqaannartumik toqqaannanngitsumilluunniit tunisineq pisinnaanngilaq, tunisinissaq Naalakkersuisut akuerisimanngippassuk.

§ 21. Sunik pisoqartillugu akuersissutip atorunnaarsinneqarnissaa imaluunniit Naalakkersuisunit utertinneqarsinnaanera pillugu akuersissummik tunniussinermi piumasaqaatit Naalakkersuisut aalajangersaassapput.

§ 22. Pisinnaatitsissummik pigisaqartup pisussaaffi qanoq annertutigisumik atatiinnarneqassanersut imaluunniit piginnaatitsissummik pigisaqartup akuersissutip taamaatereernerani qanoq allanik pisussaaffeqassanersoq pillugu Naalakkersuisut malittarisassanik akuersissuteqarnermilu piumasaqaatinik aalajangersaasinnaapput.

Kapitali 10

Sillimmasiinikkut matussusiinissaq aamma sillimmasiissuteqarnissaq

§ 23. Akusersissummik tunniussinermi Naalakkersuisut piumasaqaatit pisinnaatitsissummik pigisaqartumut piumasarisinnaavaat pisussaaffit akisussaaffillu sullimmasiinikkut allatullunniit qularnaveeqqusiinikkut qularnaveeqquserneqarsimassasut.

Imm 2. Akusersissummik tunniussinermi Naalakkersuisut piumasaqaatit piumasarisinnaavaat, pisinnaatitsissummik pigisaqartoq peqqissutsimik sullinneqarnermik pissarsinissani pillugit peqqinnissaqarfimmik isumaqatigiissusiortussaasoq, tamakkununnga ilaallutik ajutoornermi takornarianik aallarussisarnissaq, kiisalu tamakkununnga aningaasartuutit matussusernissaannut sillimmasiineqassasoq.

Kapitali 11

Piumasaqaatit nalinginnaasut

Ingerlatanut piumasaqaatit nalinginnaasut

§ 24. Ingerlatat akuersissummut ilaasut siunertaqartumik kiisalu isumannaallisaaneq, peqqissuseq avatangiisillu eqqarsaatigalugit illersorneqarsinnaasumik ingerlanneqassapput.

Nakkutilliineq, peqqussuteqarneq paasissutissanillu nalunaaruteqartarneq

§ 25. Naalakkersuisut akuersissummik, pisinnaatitsissummik pigisaqartumik, ingerlatanik pissutsinillu inatsimmut imaluunniit akuersissutitut ilaasunik nakkutilliisuupput.

Imm. 2. Inatsisartut inatsisaannik, inatsisartut inatsisaat malillugu aalajangersakkanik kiisalu akuersissuteqarnermi piumasaqaatinik eqquutsitsinissaq pillugu Naalakkersuisut peqqussuteqarsinnaapput. Peqqussutit pisinnaatitsissummik pigisaqartumut inatsisartut inatsisaannut ilaasumut tunniunneqarsinnaapput. Nakkutilliisutut oqartussat sulisui suliffeqarfiup ilaanut tamanut ingerlatanullu inatsisartut inatsisaanut matumunnga ilaasunut qaqugukkulluunniit eqqartuussivimmit akuersissummik pissarseqqaaratik naammaginnartumik kinaassutsimik uppersaateqarlutik isersinnaatitaapput, nakkutilliinermi suliasat isumagissallugit tamanna pisariaqartinneqarpat.

Imm. 3. Pisinnaatitsissummik pigisaqartup paasissutissat suulluunniit ingerlatanut inatsimmut akuersissummullu ilaatinneqartut oqartussatut suliarinninnermi pisariaqartinneqartut tamaasa nalunaarutigisassavai. Naalakkersuisut inatsisartut inatsisaanni ilaatinneqartunik oqartussatut suliarinninnissaq ingerlanniarlugu pisinnaatitsissummik pigisaqartoq paasissutissanik nassiusseqqullugu peqqusinnaavaat, Naalakkersuisut pisariaqartitaattut isumaqarfigisaat malillugu ilusilerlugit.

Oqartussat aningaasartuutaannik utertitsisarneq

§ 26. Sulianik suliarinninnermut atatillugu kiisalu inatsisartut inatsisaat malillugu oqartussatut suliarinninnermut allanut aningaasartuutit pisinnaatitsissummik pigisaqartup akilertussaavai. Akiliut sullinneqarnermi akiliutitut imaluunniit aningaasartuutit utertitsinertut akileqquneqarsinnaavoq.

Takornariartitsinermi ingerlataqarnermut akuersissuteqarnermut, akuerisaanermut imaluunniit oqartussatut suliarinninnermut il.il.inatsisit allat malillugit piumasaqaatit

§ 27. Inatsisartut inatsisaat malillugu akuersissutit, akuerisaanerit aamma oqartussatut suliarinninnerit piginnaatitsissummik pigisaqartumut inatsisit allat malillugit akuersissutitut, akuerisaanernut aamma oqartussatut suliarinninnermut piumasaqarfigineqarnissaminut pinngitsoortitsisinaanngilaq.

Kapitali 12

Pineqaatissiissutit aamma atuutilerfissaa

§ 28. Kinalunniit piaaraluni imaluunniit annertuumik mianersuaalliornikkut ima iliortoq akiligassinneqarsinnaavoq:

- 1) § 6, imm. 1 unioqqutillugu takornariartitsinermi ingerlatanik neqerooruteqartoq imaluunniit tunisisoq.
- 2) Inatsisartut inatsisaat malillugu akuersissummi tunniunneqarsimasumi piumasaqaatinik, inatsisartut inatsisaat malillugu aalajangersakkanik imaluunniit akuersissummi piumasaqaatinik aalajangersakkanik unioqqutitsisoq.
- 3) paasissutissanik § 18, imm. 1 malillugu peqquneqarnermik nalunaarutigineqarsimasunik imaluunniit akuersissuteqarnermi piumasaqaatinik oqartussat pissarsiassatut piumasaqaataannik eqqunngitsunik imaluunniit pututitsiniutinik nalunaarutiginnittoq imaluunniit paasissutissanik nipangiussisoq, imaluunniit
- 4) § 25, imm. 2 imaluunniit 3 malillugit peqquneqarnermik nalunaarutiginninnermik

piviusunngortitsinissamik eqquutsitsinngitsoortoq.

Imm. 2. Inatsisartut inatsisaat malillugu maleruagassani aalajangerneqarsimasuni, maleruagassanik unioqqutitsineq akiliisitaanermik pineqaatissiisoqarsinnaasoq aalajangersarneqarsinnaavoq.

Imm. 3. Inatsisartut inatsisaat imaluunniit inatsit malillugu maleruagassat aalajangerneqarsimasut pisinnaatitsissutaannik akiliisitsinissamik pineqaatissiineqarpat, akiliisitsineq inatsisit malillugit inummut Kalaallit Nunaanni pinerluttulerinermi inatsimmi atuuttumi malittarisassa at malillugit akiliisitsineq pineqaatissiissutaasinnaavoq.

Imm. 4. Inatsisartut inatsisaannik imaluunniit inatsit malillugu aalajangersakkanik unioqqutitsinermi Kalaallit Nunaanni pinerluttulerinermi inatsimmi malittarisassat malillugit arsaarinnissuteqartoqarsinnaavoq. Arsaarinnissuteqarneq landskarsimut iluaqutissatut isumagineqassaaq.

Imm.5. Akiliisitsiissutit inatsisartut inatsisaat manna malillugu imaluunniit inatsisartut inatsisaanni aalajangersakkat malillugit pineqaatissiissutigineqartut landskarsimut pissarsiaritinneqassapput.

§ 29. Inatsisartut inatsisaat atuutsinneqalissaaq ulloq 1. januar 2013.

Namminersorlutik Oqartussat, 3. december 2012

Kuupik Vandersee Kleist

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut